



Bineix ndwen 9 ngoenz 3 hauh dwg ngoenz geiqniemh dingjhoenx Yizbwnj ndaej hingz 74 hopbi guek raeuz. Ngoenzde gou riengz geij boux-daeuz hagdangz Nazheuj roengz mbanj bae Ndoidoengzguj Siujyoz guh aen hozdung gyaez guek gyauyuz nem geiqniemh boux hoenxcienqg vut-mingh.

Ndoidoengzguj Siujyoz gizsaed dwg aen diemjsonhag lajmbanj iqet ndeu, gvi hagdangz Nazheuj guenj, ranzhag couh hwnj youq lajdin Ndoidoengzguj, gij lwnyez Siujmuenx、Daihniq、Ranzdoeng caeuq Nazmaenz geij aen mbanj iq lajdin Ndoidoengzguj cungj comz daeuj gizneix haeujhag doegsaw. Aenvih geij aen mbanj neix dingzlai vunz cungj daengx ranz bae baihrog dajgoeng, mbouj miz maz vunz youq ranz guh nazreih, ndigah aen diemjsonhag neix lwghag gig noix, mbouj rim 20 boux, ngamq miz song boux lauxsae.

Vunz cungj naeuz Ndoidoengzguj dwg gizdieg gaeuq dingjhoenx Yizbwnj ndeu, gou caeuq yaucangj Lij Swngcwngz、hagdangz dangjcihbu suhgi Siz Gozyen geij boux, daiq cungj simcingz gingqfug bouxak ciuhgonq, heuh goenglauX Lij Vwnzdoh Mbanj-ranzdoeng daiq roen hwnj dingj ndoi bae yawjyawj. It loh hwnjbae, diegndoi youh lingq youh nya, gohaz go'em gosiek gogut deiwndtdwt, lwnim lwgyid lwgcaemjconq lwglauXleix baenz foengq baenz roix, faexbek faxmiek faexraq faexgauj gogo daengjcup raemhrwd, gaeunajreuq gaeudannding gaeugat gau'maenz-haeuxremj banh gwnzfaex geuj-nangnang, hawj vunz roxnyinh lumj gaenq byaij haeuj ndoengfaex ranghdieg hwnqndat bae nei. “Bin daengz gwnz ndoi sang, vang yawj gizgiz daemq”, dou ndwn gwnz dingjndoi yawj coh baihsaenamz, raen diuz roen gaeuq Yungh-Ginh goengloh yienhsag lajda cingcing cujcuj.

Ndoidoengzguj yiengh ndoi luenz lumj aen gyongdoengz, diegndoi mienhcik daih'iek 8 bingzfueng goengleix, baihsaebaek gvi Nanzningz Si Liengzging Gih Nazheuj guenj, gizneix ndoi sang lueg laeg, heih souj hoj gung. Duenh roen Yungh-Ginh goengloh gvaq giz henzgyawj neix miz Giuzmbanjbien、Giuznazbenj、Giuz-nanzvanq daengj doengh diuz giuz doiq hoenxcienqg daeuj gangj gig youqgaenj. Doenghbaez bingdoi

Cungguek uk caen gvai, rox youq gizneix dingjhoenx fangzraq Yizbwnj.

Gou raen miz di geizheih, doengh aen mbanj wng vunz cungj doxcanj hai ndoi ndaem faex suzswng'h'anh, ciemhciemh byaij hwnj loh fouq, vihmaz gizneix diegndoi nyaenx lai lij ce fwz, nanzdauh gyoengq vunzmbanj gizneix mbouj ngah ngaenz? Gou ngeizvaeg cam goeng Lij Vwnzdoh, de naeuz: “Dou gizneix gyoengq bouxcoz cungj mbouj youq ranz, mbouj miz byawz daeuj guh. Geij bi gonq caemh miz lauxbanj baihrog daeuj yawj gvaq, yaek ok ngaenz cingzbau Ndoidoengzguj ndaem faex, geij bouxdaeuz ndawmbanj doxyaeng gvaq le, mbouj nyienh bau hawj de, ce daeuj nai gij hoenz doenghboux dingjhoenx Yizbwnj vutmingh.”

Gou gag roxnyinh simgenx, geij ngoenz gonq gou daegdaengq cazyawj 《Yunghningz Yen Ci》gvaq, mbouj raen duenh lizsij neix ndaej ciengz-saeq geiq roengzdaeuj. Gou nyaenx mbouj ndaej, gag ngon hot fwen:

“Bin hwnj Ndoidoengzguj,
Maknguh naeuh lajdin,
Gizgiz nyungzndoeng mbin,
Ndawsim naekgywggywg.

Bing seizgonq dwgengz,
Ndokgoet gveng denh neix,
Dainanh mbouj vunz daej,
Saeh gvaq mbouj vunz cam.”

Daj gwnz ndoi roengzma le, dou cujciz gyoengq lauxsae、hagseng、vunzmbanj baizdoi h swng guekgeiz caez ciengq guekgo, naj coh Ndoi-doengzguj mwzaih 3 faencung, geiq-niemh doengh boux dingjhoenx Yizbwnj deng vutmingh. Lij biujyienj ciengq go 《Gou Caeuq Aen Guekcoj Duh Gou》, dawz diengzbingj daeuj baen hawj vunzlai caez gwn, hawj caezgya ndaej gamjsouh guek raeuz ndwenngoenz diemzvan. Caemhcai q cingj goenggeq ndawmbanj gangjlwnh gij gojsaeh dingjhoenx Yizbwnj caeuq fangzraq Yizbwnj haeuj mbanj daeuj guh gij saeh vaih saeh luenh.

Bi 1939 ndwen 11, daihbouhdoi h fangzraq Yizbwnj giengzhengz daj Ginhcouhvanh hwnj hamq hoenx ciemq haeuj singz Ginhcouh le, youh yungh feihgih coq cadan caq Haw Siujdoengj mokmok mekmek bae.

Fangzraq Yizbwnj bing ak cungq ndei, hoenx haeuj Ginhcouh、Lingz-sanh、Siujdoengj cungj mbouj miz

vunz dingj ndaej youq, gyoengqde haeuj daengz gyawz cungj coemh feiz gaj vunz ciengjaeu doxgaiq, lij apbik bouxcoz ndangrengz bae guhhong, coengh gyoengqde ramgwed daehyinh gak cungj doenghyiengh hoenxcienqg aeu yungh. Mbanjsiujmuenx boux duicangj geq Lij Vwnzswng naeuz dou nyi, bihaenx Ndoidoengzguj hoenxcienqg, de ngamq ndaej 3 bi, riengz bouxlaux deuz haeuj lueglaeg laeng Mbanjdaihniq bae. Mwhde feihgih Yizbwnj sei qvaenz seiqlengq gwq coq cadan caq, doenghboux mehmbwk umj lwgsaeq cungj aeu benq sujbaq ndeu goemq bak goemq ndaeng lwgnding mbouj hawj daej oksing, lau lwnyez daej deng fangzraq Yizbwnj rox miz vunz ndoj youq neix daengx mbanj cungj deng nanh. Lij Vwnzswng naeuz de miz dahnuegX ndeu, mwh umj youq ndaw rungj daxmeh doq daej doq gwn cij, feihgih Yizbwnj gvaengxgvax gwnz gyaeuj nanznanz mbouj deuz, daxmeh vih mbouj hawj de oksing, yungh sujbaq goemq bak goemq ndaeng dahnuegX iq ndaet lai deng mbaetheiq dai bae.

Mwh Yizbwnj ngamq ciemq haeuj Haw Siujdoengj, Cungguek raeuz sikhaek baij bingdoi h Guengjsae 175 sw h 525 donz lienzhah Siujdoengj、Nazheuj gij minzchung dingjhoenx Yizbwnj cap hwnj Ndoi-doengzguj, caemhcai q caqcak Giuzmbanjbien caeuq Giuznazbenj bae, laengzdangj mbouj hawj fangzraq Yizbwnj hwnj Namzningz.

Fangzraq Yizbwnj ciemq Ginhcouh caeuq Siujdoengj le, sikhaek diuh bing yaek cung hwnj Nanzningz, daengz neix raen Giuznazbenj、Giuzmbanjbien deng caq lak, vih baujcwng gij bing gij bikmax cungqbauq gyoengqde ndaej daeh gvaqbae, couh haeuj geij mbanj gyawj ap vunz daeuj guhhong, cek ranz aeu cien aeu faex bae dap giuz. Gij vunz deng ap bae guhhong haenx, danghnaeuz byawz caeg ndojgik saekdi couh sikhaek dangciengz deng gaj dai.

“Yizbwnj hangz yied haenq, vunzmbanj couh yied haenz. Doengh bouxcoz cungj gaem cungq dingjhoenx.” Henzgaen h geij aen mbanj bouxboux cungj haenz fangzraq Yizbwnj haeuj ndok haeuj ngviz bae, gij hauXseng mizrengz cungj doxcanj dawz cungq dawz cax gaenriengz bingdoi h guek raeuz bae dingjhoenx. Vunz raeuz cap maenh Ndoidoengzguj, fangzraq Yizbwnj coi h roen dap giuz

lai baez cungj deng gij vunz raeuz dwkhoenx, deng dai deng sieng mbouj noix. Fangzraq Yizbwnj fouzfap fuk dap giuz, itseiz mbouj ndaej hoenx haeuj Nanzningz, hozgaek raixcaix, couh aeu feihgih daeuj luenh caq geij aen mbanj henzgyawj loemqloemq laklak bae.

Bingdoi h Cungguek buekdai bae dwkhoenx. Gyoengq fangzraq Yizbwnj baen geij buek bing daj bai h Geuqcwzdaeg cung hwnjbae cungj deng siumied dai liux. Fangzraq Yizbwnj vihliux ciemq daengX Guengjsae, dem engq lai bing daeuj dwk hoenx Ndoidoengzguj. Bingdoi h Cungguek dingjhoenx le 7 ngoenz 7 hwnz, doeklaeng aenvih bai h Cungguek raeuz gak cungj doenghyiengh hoenxcienqg aeu yungh mbouj ndaej gibseiz soengq daeuj bouj, “bikmax duenh haeuxgwn gat”, doeklaeng daengX gyoengq guenbing caeuq ginzchung 300 lai vunz deng feihgih daihbauq Yizbwnj haenq caq cienzbouh deng nanh. Dingqnaeuz mbat ciengq neix bing Yizbwnj hix deng dai bae gaen h 1000 vunz, seihaiz ringx rim bangX ndoi、ndaw naz、ndaw ndoeng、henz roen, gizgiz cungj miz.

Bingdoi h Guengjsae 175 sw h 525 donz baez youq Ndoidoengzguj dingjhoenx fangzraq Yizbwnj yienz-naeuz doeklaeng saetbai h caemhcai q bai h ndaej gig camj, hoeng cix ndaej laengzdangj fangzraq Yizbwnj geij ngoenz, ndaej bangrengz guek raeuz caeuq Yizbwnj hoenx mbat Gveinan z Veican lailai, hawj daihbouhdoi h guek raeuz hoenx ciengz ciengq Gunh-lunzgvanh Canyiz ceng ndaej cuk-gaeuq seizgan guh cunjbei. Doengzseiz daejyienh ok le gij cingsaenz bouxbing boubeksingq doxgiet dingjhoenx caemhcai q mbouj fug baihrog daeuj hangz.

Banhaemh, dou yaek dauqbae lo, raq rumz iq ndeu ci gvaqdaeuj liengzyauyau, mbaw geiznding hajsing naj ranz aen hagdangz iqet set swnh-rumz mbinyagyag. Lij yaucangj sim naekdumdum dingh ndwn le haujlai nanz, haibak eu fwen:

“Yizbwnj dangq raemx haeuj,
Ndoi sang daeuj saek fai,
Bouxbing gyaez guek lai,
Buekdai bae dingjhoenx.

Dieg hoenxcienqg doenghbaez,
Seizneix hwnj ranzhag,
Geiznding mbinyagyag,
Guek raeuz ak dangqmaz.”